

# INUIT ATAQATIGIIT

## INATSISARTUNI



23. juli 2013

EM 2013/89

Inatsisartut suleriaasianni § 33 naapertorlugu aalajangiussassatut siunnersuut una saqqummiuppara:

**Naalakkersuisut pisortat pisiortorneranni inatsisitigut, teknikikkut aammalu niuernerpalaarneq eqqarsaatigalugu neqeroortitsinermi atorneqartartussamik inatsisissatut siunnersuummik saqqummiussinissamut pisussaaffilerneqarnissaannik Inatsisartut aalajangiussassaattut siunnersuut. Inatsisissatut siunnersuutip qulakkiissavaa pisiffigisat assigiimmik pineqarnissaat, neqerooruteqartitsinermi pisiffissat toqqarneqarneranni sinaakkutissat ersarissuunissaat aammalu neqerooruteqartoqartillugu maalaaruteqarfiusinnaasumik pilersitsisoqarnissaa. Inatsisissatut siunnersuummi aamma pisiffissat toqqarneqarneranni inuiaqatigiit aningaasaqarnerat tamakkiinerusumik qanoq isiginiarneqartassanersut pillugit maleruagassiortoqarnissaa ilaatinneqassaaq.**

(Inatsisartuni Naaja Nathanielsen, Inuit Ataqatigiit)

### **Tunngavilersuut**

Kalaallit Nunaanni nioqqutissanik pisiniarneq tamatigut akikinnerpaajusanngilaq. Akikinnerpaarli tamatigut pitsaanerpaajusanngilaq. Inuiaqatigiitsinnut pingaaruteqarpoq najukkani suliffeqarfeqarnissaa najukkani suliffissaqartitsisunik nunamilu maani atugassarititaasunik ilisimasalinnik.

Novembarimi 2011 Naalakkersuisut siuliisa pisiortornermi nalunaarusiaq saqqummiuppaat Tassani erserpoq Namminersorlutik Oqartussat qitiusumik allaffeqarfiat immikkoortullu taassuma ataaniittut ukiumut minnerpaamik 1,5 milliarder kruunit nalinginut pisiortortartut. Taamaalilluni pisortat pisiortornerat najukkani suliffeqarfiit isertitarisartagaannut anner-toorujussuarnik tunngaviliisuvoq.

Ullumikkut pisortat pisiortornerannik sinaakkusiisussamik inatsisitigut nalimmassaatis-saqanngilaq, kaajallaasitaliaq kisimi najoqqutarineqartussaammat. Tamanna soorunami eqaallisaataasinnaavoq. Aammattaarli neqerooruteqartitsisarnermi suliassanillu agguaassinermi ersarinngitsunik tunngaveqalersitsivoq, tamannalu toqqissisimananngilaq. Neqerooruteqarnermi, suliassanik agguaassinermi piumasaqaatit maalaaruteqarnissamullu periarfissat ersarilluartut pisariaqarput.

Pisiortornermi nalunaarusiami pingaartinneqarpoq pisortat pisiortornerminni pisariillisaanikkut ataqatigiissitsinertigullu aningaasanik sipaaruteqarsinnaanissaat. Soorunami pingaaruteqarpoq pisortat inuiaqatigiit aningaasaataat atorlugit pisiniaraangamik akit qanoq innerannik nakkutiginninnissaat. Taamatulli aamma pingaaruteqarpoq niuernermi inuiaqatigiit aningaasaqarnerannut kingunerisassaannik nalilersuisarnissaaq, taamaalilluni eqqumaffigisassat assigiinngitsut oqimaqatigiissaakkamik aamma isiginiarneqarsinnaaniassammata.

Nuummi suliffeqarfimmi Uummannamilu suliffeqarfimmi atugassarititaasut pisariaqartitallu assigiinngitsorujussuusinnaapput. Soorlu assersuutigalugu Uummannami maskiinamik

nakkutilliisinnaasumik pissarsinissaq Nuummiit ajornakusoornerusinnaavoq. Atugassarititaasut tamakku assigiinnginngerat najukkani suliffeqarfinnit ilisimaneqarput, tamannalu uanga isummanni pitsaaqutaavoq.

Taamaattumik isumaqarpunga inuiaqatigiit aningaasaqarnerannik miannerinninneq inatsisissami ilanngunneqartariaqartoq. Soorlu assersuutigalugu neqerooruteqarnermi piumasaqaatinik ajugaanissamut iluaqutaasunik allattuisoqarsinnaavoq, soorlu najukkamiittuunissamut, suliffimmik misilii ffiusinnaasunik pilersitsinissamut imaluunniit Kalaallit Nunaanni suliaqarnermik misilittagaqartuunissamut tungasunik. Aamma eqqarsaatigineqarsinnaavoq najukkani pisiffigisat avataaniit pisiffigisaniit akisunerulaarnissaannut periarfissaqartitsinissaq.

### **Pisortani aningaasaqarnikkut allaffissornikkullu kingunerisassa**

Soorunami nutaarluinnarmik inatsisiliornissaq aningaasartuutitik atuiffiussaaq. Siunnersuutigineqarpoq aningaasaliiffigineqarnerata ilaa konto 20.30.05 atorlugu pissasoq, tassanimi nutaaliornermi suliassat projektinillu suliaqarnej pineqarput. Siunnersuut piviusunngortinneqaralarpat Namminersorlutik Oqartussat aningaasaqarniarnerannut iluaqutaassasoq nalilerneqarpoq ataatsimiut isigalugu siunnersuutigineqartup kingunerisaanik pisiortorneq Namminersorlutik Oqartussanut pisariuvallaarunnaarluni ataqatigiis-saarisoqalerneranik nassataqassammat.

### **Namminersorlutik inuussutissarsiortunut aningaasaqarnikkut allaffissornikkullu kingunerisassa**

Kingunerisassaasa Kalaallit Nunaanni namminersorluni inuussutissarsiortnermut tamakkiisumik iluaqutaanissaat naatsorsuutigineqarpoq, pisiortornissamut sinaakutissat erseqqissut pilersinneqassammata inuiaqatigiillu aningaasaqarnerannik mianersuussinissaq ullumikkornit pingaartinneqarnerulissammat. Siunnersuutip kingunerisaanik Namminersorlutik Oqartussat pisiniartarneri amerlanerit maannamut sanilliullugu unammilleqatigiinnerulernermit aamma sunnersimaneqalissapput. Tamanna namminersorluni inuussutissarsiortnermut iluaqutaassagangatinneqarpoq pisiniarfigineqartummi imminnut unammille-qatigiinnerulerneranni kifpartuussineq taakkunanga ataavartumik pitsanngorsarneqartuarnissaa aallunneqarnerulissammat.

### **Innuttaasunut aningaasaqarnikkut allaffissornikkullu kingunerisassa**

Soqanngilaq.